

續築龍津木橋記

天下事有致力於此，而收效輒及於他事者。其機不數觀，要惟好行方便者，往往得之。九龍濱海龍津石橋，創於同治癸酉，問津者咸便利之。顧地為巨浸所朝宗，潮汐往來，沙磧多停蓄，自成橋後，歲月積漸，滄桑改觀，邇來橋之不逮於水者，殆猶今之視昔焉。

於是，商於是地者，謀所以善其後也，仿招商局碼頭之制，續作橋二十四丈，又於其端，為丁字形，寬一丈二尺，其製精而其費較省，且易石而木，泊船時亦無兩堅激撞之患，其為用亦更適，計縻題捐洋錢一千七百有奇。

至渡港小輪船以斯橋之利其載運也，每船願月輸碼頭租銀若干。會樂善堂施濟所需，捐款不恆，至僉謂碼頭租款宜屬之樂善堂，永資挹注，蓋藉斯地之財，即以濟斯地之用，實一舉而兩善具焉。

昔莊子有言：以鹵莽耕者，天即以鹵莽應之，茲則以方便行者，天亦以方便應之，人事所感，即天心所感，即天心所錄，斯可以識其大凡矣。是不可以不記，且為之銘曰：

長虹飲川，波湧雲屬，架木為樑，用拷斲足，如雁齒之平，匪梟脛之續，資沾溉夫善堂，樂斯人之得欲，合藏市以出塗，慰成功而相告，銘貞石以勵來茲，擬郾閣之頌於蜀。

巳卯科舉人知縣 麥拔愷 謹撰

光緒十八年(1892)歲次壬辰仲秋吉日

倡建人計開：

總鎮銜署廣東大鵬協鎮都督府吉

署理廣東大鵬協鎮府承襲雲騎尉陳

一等寶星三品九龍關柏

廣東大鵬協鎮中軍都督府陳

調署新安縣九龍巡政廳南海縣右堂周

廣東大鵬協左營中軍守府成

署廣東大鵬協鎮右營守府補用都府方

欽加三品銜管帶南國輪船鄭